

Tuesday, June 3, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



UNION MOS

Chief Minister Pu Lalduhoma chuan Mizoram tlawha lo zin mek Union Minister of State for Road Transport & Highways Pu Ajay Tamta hnenah Silchar atanga Aizawl 4 lane laih mekah Kawnpui leh Sairang inkar hnathawhna tur sum pe chhuak rang turin a ngen.

Chief Minister chuan kawngpui chu India ram laili nena inkalpawhna kawngpui pawimawh bik a ni a ti a. Kawnpui leh Sairang inkar chu kutthlak a nih rih loh avangin nikum furah nasa takin harsatna an tawk tih sawiin kuminah harsatna an tawk leh mek a ti a, a inkar hnathawhna tur sum chu sawrkar laipuiin a la pe chhuak lo tih sawiin Mizoram chak lakna kawngpui ber anih avangin hmalak pui thuai turin a ngen a ni.

Chief Minister hian, Mizorama National Highway te chu awlsam zawk leh rang zawka thawh a nih theih nan Strategic Highway a puan tha a tih thu te, fur ruahtui tlak tamna ram a nih vanga concrete zela kawngpui siam tha a tih thute a lo hrilh a. Heliport din tura hmalakna kal mek chanchin a sawipui bawk.

Pu Ajay Tamta hian, Chief Minister thil sawi te chu theihtawp chhuahin a lo bawhzui tih a sawi a. Inkawmna hun tha tak a siamsak avangin a lawm thu a sawi bawk.

Union Minister of State hian tun kar khan Hnahthial District pawh tlawhin Higher Secondary School building Samagra Shiksha hnuaia sak a tlawh bawk a, hemi zawh hian DC Conference Hall ah District chhunga mi pawimawh te kawmin Central Scheme hrang hrang an sawiho a, District chhunga hmalakna kal mek te leh hmachhawp hrang hrang te sawi ho a ni.

(DIPR)

◊◊◊OCULAR TRAUMA

Civil Hospital-a Eye Specialist Dr Zoremkawii’n mit enkawl uluk a pawimawh tih sawiin mita bawlhhlawh a luhin nuai mai loa tuia fai taka sil a pawimawh tih a sawi.

Dr Zoremkawii sawi danin thli thaw leh lirthei khalh changin mitah bawlhhlawh tam tak a lut thei a ti a, heng bakah hian Grinder leh Welding khawih zingah thir them a lut duh thin tih sawiin fimkhur a ngai hle a ti a, hengah hian mit chu nuai mai lo tur leh tuia sil fai a pawimawh tih sawiin a fiah theih mai loh chuan Doctor rawn vat a pawimawh tih a sawi.

Byte...Dr Zoremkawii

Mithiam te sawi danin mita bawlhhlawh leh thir them awm hi lak chhuah loa rei tak a awm chuan mit ulcer a thlen thei a, heng bakah hian tauh palh emaw accident emaw avanga mit meng theilo ten enkawl na tha tak an hmuh theih nan doctor pan vat a pawimawh hle a ni.

(Corr : Maremi)



WORLD BICYCLE DAY


World Bicycle Day pualin vawiin khan Mizoram Cycling Association chuan Mizorama thirsakawr khalh thin zawng zawngte World Bicycle Day chibai an buk.

World Bicycle Day hi United Nation General Assembly chuan kum 2018, April khan hman tan turin a rel a, heta tang hian kum tin June 3 hi World Bicycle Day atan hman a lo ni ta a, World Bicycle Day ah hian rilru leh taksa hrisel neih inzirtir te, boruak thianghlim lo pung zel tur ti reh tura hmalak bakah nitin veivahna kawnga harsatna thlen lo zawnga hmalak hi a pawimawh zual a ni.

Byte...Cyclist LZ Varte

Mizoramah pawh World Bicycle Day hi Mizoram Cycling Association hmalakna in kumtin hman thin a ni a, cycle rally te buatsaihin he ni-ah World Bicycle Day in a tum hrang hrang inzirtirna atan hun hman a ni.

(Corr : Chawnga)



PM MODI

Prime Minister Narendra Modi chuan Assam Chief Minister Himanta Biswa Sarma leh Sikkim Chief Minister Prem Singh Tamang te bia in Hmarchhak state-a ruahsur leh tui lian avanga an harsatna a sawi pui a, tanpui an ngaihna ah sawrkar laipui chuan theihtawp chhuah a inpeih thu a sawi.

Assam Chief Minister Himanta Biswa Sarma chuan Assam chhunga tuilian tuar engemaw zat an awm thu a sawi a, ram chhunga chhanchhuah hna thawk tu ten theih tawp in hma an lak mek thu a sawi. Sikkim Chief Minister Prem Singh Tamang pawh in an ramchhung ah tui lian leh leimin in a tih buai te tanpui hnathawh kawng a Prime Minister in a tanpuina ah lawmthu a sawi bawk.

(News on AIR)



DELEGATES

Operation Sindoor hnuaia India in firfiaka chetna leh rawlrala chet dona a kalpui mek ah palai hrang hrang ten ram hrang hranga an aiawhte hmu in India dinhmun an sawi fiah.

Ram aiawh palai te hian ram hrang hrang hruaitute leh mithiam hrang hrang bakah chanchinbumite kawmin Ram hrang hrang hruaitute hian India in firfiaka chetna a dona kawnga a hmalakna a thlawp zia leh rawlrala chetna a chetna an do zia an lo hrilh a ni.

(News on AIR)

